



Synfocity = 992

mail us at : mzsynfo@gmail.com; mizoramsynod@gmail.com - Phone - 2314648

July 3, 2025

❑ **Synod Music School buatsaih Music Recital**

Synod Music School chuan June 28, 2025 (Inrinni) khan Synod Conference Centre, Pi Zaii Hall-ah Recital vawi 8-na an hmang a. Pu John Lalhruaitluanga, Worship Coordinator-in Introductory Short Speech a neih zawhah Upa F. Lalthanmawia, Worship Committee-in hunserh hmangin recital hlanna a nei nghal a ni. Recital-ah hian Piano zirlai mi 74, Violin zirlai 13 leh Vocal zirlai mi 15 ten thla ruk chhunga an zir te, mawi leh thiam takin an pholang a, zirlai nu leh pa ten an tawiawm a. Zirlaite hi Certificate pek vek an ni.

Synod Music School-ah hian nitin Keyboard, Violin leh Zai (Vocal) zirna kalpui a ni a, kum khatah session hniha kalpui a ni. Tonic Solfa leh Staff Notation zirna pawh zingkarah Synod Music School, Synod Office Annex-ah leh Bawngkawn Kohhran Hall-ah nitin neih thin a ni a, thla thum course (Intermediate) niin March - May, June - August leh September - November-ah te neih thin a ni.

❑ **Campus Ministry**

June 26-27, 2025 chhung khan PES, Cherhlunah rawngbawlina neiin Rev. H.L. Thianghlina, Director leh Tv. Lalrinchhana, Counselor te bakah Resource person Upa Lalnunsiana Khalthang leh Pu C. John Saiparlina te an kal. He hunah hian zirlaite hnena rawngbawlina bakah zirlai nu lah pate nen "Nu leh Pa zan" an hmang bawk.

❑ **KTP**

♦ June 27-29, 2025 chhung khan Hmarchhak Presbytery KTP Meet vawi 7-na, N.E. Khawdungsei Kohhran Biak Inah hman a ni a, hemi hunah hian CKTP hruaitute Pu C. Lalkhawngaiha, Asst. Secretary, T.Upa David Lalfakawma, committee member leh Mizoram Synod Choir te an kal.

♦ June 28-29, 2025 chhung khan New Serchhip Bial Members' Meet, New Serchhip Kohhran Biak Inah neih a ni a, hemi hunah hian CKTP hruaitute Pu Lalruatfela, Asst. Leader leh Pu T.C. Lalhruaitluanga, committee member te an kal.

♦ June 28&29, 2025 chhung khan East Lungdar Venghlun Bialah Mipat hmeichhiat hman khawloh leh Ruihhlo that loh zia leh a do dan tur inzirtirna awareness campaign neihpuiin CKTP hruaitute Pu F. Lalremruata, Fin. Secretary leh committee member-te, T.Upa Lalthananga leh Upa C. Malsawmtluanga te an kal.

❑ **Trust**

♦ July 1, 2025 (Thawhlejni) khan Synod Trust department Monitoring Team leh Contractor Upa CT Mawia te Mizoram Christian College (MCC) sak mek hnathawh kal dan, thlen chin leh hmabak te enin an kal. MCC building sak mek hi January 9, 2024 khan College Compound, Tanhrilah lungphum phum a lo ni tawh a, CZS Construction, Kolasib-in a sak hna an thawk a ni.

♦ July 3, 2025 (Ningani) hian Kawnpui Pastor Quarters siamthat ngaite en felin Pu Lalramenga Royte, J.E a kal.

❑ **MSSU**

July 5, 2025 (Inrinni) hian Sunday School Training neihpui turin MSSU Trainer-te hetiang hian an chhuak ang:

Chawllhmun Bial : Upa Hrilthansanga, Upa B. Hmingthanruala leh Upa Lalrinawma Ralte

ITI Vengchhak Kohhran : Upa K. Vanlalnghaka, Upa Isak Zanzoliana Chhangte leh Upa H. Lalnginglova

❑ **Mizoram Christian College (MCC)**

Mizoram University-in Even Semester 2025, Choice Based Credit System (CBCS) Under Graduate exam result a tihchhuahah MCC atanga Final Semester Exam result neih dan chu hetiang a ni:

BBA-ah zirlai 8 atangin 8 an pass kim vek a, Top 10 Rank Holders - University puma a titha sawm zingah 7-na leh 10-na dinhmun an hauh.

Commerce-ah zirlai 17 atangin 16 an pass a, pass percentage chu 94.12% a ni.

Arts Stream-ah zirlai 43 atangin 40 an pass a, pass percentage chu 93.02% a ni.

❑ **SL&PB**

June 30, 2025 (Thawhtanni) khan Bethlehem Bialah Mizotawng humhalh chungchang zir hona neihpuiin Pi Rinsailovi, Jt. Editor leh Upa Prof. H. Lalthanzara, BEC member te an kal.

❑ **Kohhran ni pawimawh Health Sunday & Hospital Sunday**

July 6, 2025 (Pathianni) hi Health Sunday & Hospital Sunday (Damdawi In Pathianni) a ni a. Mizoram Presbyterian Kohhran chuan Hospital Sunday hi kum 1928 atangin a hmang tan a, kum 1981 atangin July thla Pathianni hmasa ber hi Hospital Sunday atan hman a ni.

Kum 1985 Synod Inkhawmpui thu angin 1988 atangin January Pathianni hnunung ber chu Phâr Pathianni (Leprosy Sunday) atan hman thin a ni. Kum 2004 Synod chuan phâr pual chauh ni lovin natna dangte pawh huamin 'Health Sunday' tiin a thlâk ta a. Kum 2006 atangin Health Sunday hi hman tan a ni a. Health Sunday-ah hian Hriselna lam thupui chi hrang hrang zir thin a ni.

Kum 2008 Synod-in "Health Sunday leh Hospital Sunday hi Pathianni vawi khatah a ruala hman ni se" tia a rel angin kum 2010 atangin July Pathianni hmasa berah hman a ni ta a, chawhnu inkhawm hi Health Sunday pual, zan inkhawm hi Hospital Sunday pual a ni ta zel a ni. Zannah Hospital Sunday pualin thawhlawm lakkhawm a ni ang a, Hospital Charity Fund atan hman a ni ang.

Kumin Health Sunday & Hospital Sunday atan hetiang hian programme duan a ni:

Chawhnu Inkhawm

Health Sunday Pual

Thupui : Stroke leh a inven dan

Zan Inkhawm

Hospital Sunday Pual

Thupui : Tihdam rawngbawlina

Chhiar tur : Sam 103:1-5; Luka 4:40

Tun dinhmuna Synod Hospital, Durtlang leh John Williams Hospital, Lunglei-a thawktu awm dan chu hetiang hi a ni:

Synod Hospital, Durtlang

Khum awm zat	355
Doctor	37
Nursing Staff leh Sister	155
College of Nursing	24
Para Medical Staff	41
Thawktu dang	104
Thawktu zawng zawng	361

John Williams Hospital, Lunglei

Khum awm zat	30
Doctor	4
Staff Nurse	23
Thawktu dang	37
Thawktu zawng zawng	64

❑ **Synod Mission Board**

June 29, 2025 (Pathianni) khan Mission Field hrang hrangah hetiang hian belhtu thar an awm.

Nepal Mission Field	-	2
Calcutta Mission Field	-	21
Karbi Anglong Mission Field	-	1
Odisha Mission Field	-	8
Jharkhand Mission Field	-	3
Upper Assam Mission Field	-	1
Lucknow Mission Field	-	2
Assam Mission Field	-	5
Arunachal & Assam Mission Field (West)	-	3
Patna Mission Field	-	4
Belhkhawm	-	50

☐ **Synod Relief Fund**

Tun hnaia harsatna hrang hrang tawkte hnenah Synod Relief Fund atangin hetiang hian chhawmdawlna pek a ni.

S.No	Khua/Veng	Pek chhan	Chhungkaw zat	Pek zat
1.	Vanbawng Kohhran	Khuarel chhiatna		₹ 50,000/-
2.	Sailam Kohhran	Retaining wall siamnan		₹ 50,000/-
3.	Zuangtui, Muanna veng leh Muthi	Leimin tuar	3	₹ 50,000/-
4.	Kelkang	Damlo	3	₹ 30,000/-
5.	Champhai Kanan	Leimin tuar	2	₹ 26,000/-
6.	Ngopa Chhimveng	Leimin tuar	1	₹ 20,000/-
7.	Rullam	Damlo	2	₹ 20,000/-
8.	N. Diltlang	Khawsak harsa	1	₹ 10,000/-
9.	Buarpui	Damlo	1	₹ 10,000/-
			Belh khawm	₹ 2,66,000/-

☐ **Sunna : Rev. Lalnghinglova, Kum 99**

Rev. Lalnghinglova hi kum 1926 March 25 khan Tanhrilah a lo piang a, unau 4 an ni. Pi Saikungi nen kum 1957-ah Ngopaah an innei a, fa 7, tu 17 leh tuchhuan 7 an nei.

Primary sikul chu Tanhril atangin a zo va, Middle sikul chu Boys' M.E sikulah a lut a. Kum 1947-50 chhungin Mizo high sikulah a kal a, kum 1951-ah Matric a pass a ni.

Cherrapunji Theological College-ah kum 1951-54 chhung L.Th a zir a, Cherra-a a zir chhungin Student Christian Movement (SCM) chu an din a, 2nd year a zir kumin Secretary-ah a tang a, Gauhati leh hmun dangah te meeting nei turin a kal chhuak thin.

Kum 1954-ah Ngopa bialah Pro-Pastor-in a awm a. Lalchama nen Pro-Pastor hming pu hmasa ber an ni a, a hma lamah Pro-Pastor hming an la nei ngai lo. Kum 1956-ah Pastor atan nemnghet a ni a, kum 1956-1959 chhungin Ngopa bialah a awm a. 1959 kum hian Saitual bial an hmui tir a, a kum leh 1960-ah Saitual bialah an sawn a ni.

Kum 1961 atang chuan a hriselna a hniam viau mai a, Saitual atang chuan Mission Venga Theological sikul zirtirtuah an dah a. Kum 1967-1975 chhungin Aizawl Theological College-ah Lecturer hna a thawk a, kum 1967-1978 chhungin Librarian a ni. Heng bakah hian kum 1975-1981 chhungin Bible Ralchhan sikul Director hna a thawk tawh bawk.

Kum 1981-1986 chhungin Synod Publication Board-ah Reader hna a thawk leh a, a pension ta a. A pension tur chu a service pawhsei sakim kum 1987-1988 chhungin Bungkawng bialah Pastor hna a thawk leh a, kum 1989 January chuan a pension hlen ta a ni. A pension hnuah Mission Vengthlanga sap sikul an din, Goodwill English School-ah kum 1996-1998 chhung khan Principal hna a thawk leh a ni. Lehkhahu pasarih a ziak a, Essay inziahsiaknaah lawmman tum hnih a lo la tawh bawk.

June 28, 2025 (Inrinni) chawhnu lam atangin inthiar tumin bual inah a lutchhuak deuh fo mai a, a faten an han zawh lahin chhan ngaihna a hre vak lo va, zan lamah pawh a tho deuh ta sek a. June 29 (Pathianni) chu nileng zankhuain bual inah a lut leh ta sek a, ei leh in pawh a thlah ta a. June 30 (Thawhtanni)-ah Doctor anrawn a, zun leh ek thiar tum, thiar thei si lo a lo ni a, tlaiah prostate vung damdawi a ei a, a zung thei ta a. July 1 (Thawhlehi) zana chuan a buai leh ta a, a thaw ipik chu a thawmhnawte phelhin thawh a tum ta sek a. Zankhuain mumang lovin thawm a nei ta reng a, July 2 (Nilaini) zing dar 8 velah chaw leh bawngnute tlem a ei a. Chumi a ei lai chuan a hnung lamah a awn a, a chau zui ta a ni. An in bula an unau an inkokhawm a, dar 8:30-ah City Hospital-ah phurh chhoh a ni a, doctor-te leh nurse-ten theitawp an chhuah a. Zing dar 10:10-ah Lalpa hnenah chawl turin a kal ta a ni. July 3, 2025 (Ningani) chawhnu dar 1-ah Mission Vengthlang Kohhran Biak Inah Rev. K. Lungmuana, Ex-Moderator-in a vui a ni.

☐ **FM Zoawi - Aizawl & Lunglei : Hruaina Eng Radio Programme**

July 4, 2025 (Zirtawpni) @ 7:30 p.m. :

Solo : Belinda L Sailo - Isu min kai ang che, **Zaipawl :** Republic Veng Bial Zaipawl - Aw hmanhmawh rawh, **Thusawi :** Lalrinzuali leh a thiante - Pathian nen a lendun, **Solo :** C. Lalrindiki - Kraws kawng, **Zaipawl :** Serchhip Bial Zaipawl - Kan ngen che thlarau thianghlim

☐ **Hruaina Eng TV Programme**

- 03.7.2025 (Ningani)** 08:30 pm : Thupui zir bing
04.7.2025 (Zirtawpni) 05:00 pm : Kristian Naupang Pual
05.7.2025 (Inrinni) 05:30 pm : Puitling Sunday School Zirlai
06.7.2025 (Pathianni) 07:00 am : Sermon - Rev. K. Laltlanhlua
08:00 am : Weekly round up
07.7.2025 (Thawhtanni) 08:30 pm : Hruaina Eng luang chhuak - Dr. K. Lalremmawia
08.7.2025 (Thawhlejni) 06:00 pm : Nilaini zan thupui
08:30 pm : Kohhran Chanchin - Nursery Veng Kohhran

☐ **Moderator leh Executive Secretary-te Programme:**

Rev. R.C. Lalnghakliana : Moderator

July 3-15, 2025 Presbyterian Church of Wales, General Assembly

Rev. V.L. Luaia Hranleh : Senior Executive Secretary

July 3-15, 2025 Presbyterian Church of Wales, General Assembly

Rev. Dr. K. Lallawmzuala : Executive Secretary

July 1-5, 2025 CMC Council meeting, Vellore

Rev. Dr. Rosiamliana Tochwawng : Executive Secretary

July 8, 2025 Income Tax Committee programme

July 9, 2025 Synfo Committee

July 11, 2025 Zirlai Viltu Committee

July 12, 2025 Nursery Veng Bial KTP Seminar

PATHIAN THU ZIR DUH TAN

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

- Admission Form : Office hun chhungin ` 10/- a lei theih a ni
Dil hun chhung : August 21, 2025 (Ningani) tlai dar 3:00 thleng
Dil thei chin : Class VII pass, kum 16 chin, Kohhran dan chhunga awm
Interview : August 26, 2025 (Thawhlejni) chawhma dar 10:00
Class tan hun : September 1, 2025 (Thawhtanni)
Zir hun chhung : September - November, 2025

Hre Chiang duh tan Phone No. **8415852442/8794157618**-ah zawhfiah theih a ni.

Sd/-

Rev. Lalengzika

Principal

Presbyterian Bible School

